

# Ilis votants na teman betg ch' il stadi fufrogna da memia

## Il servetsch d' infurmaziun survegn dapli cumpetenzas

■ (anr/vi) Il servetsch d' infurmaziun survegn novas pussaivladads da survegliaziun. Il pievel svizzer ha acceptà ier cleramain la nova lescha che lubescha da tadlar giu telefons, dad infiltrar computers e da retschertgar en telefonins. «L'alianza cunter il fufrognim dal stadi» aveva prendì il referendum. Cunzunt sanesters, verds ed organisaziuns sco la Societad digitala han cumbattì la lescha. Da bell'entschatta ennà saja quai stà fitg difficil dad explitgar pertge che la nova lescha saja in privel, di *Tamara Funicello*, presidenta dals giuvens socialistes, sin radio SRF. Ils attentats terroristics dals ultims mais hajan rendì quasi nunpussavel da declarar che dapli surveglianza na portia nagut. Uss restia mo pli da sperar che la lescha vegnia propi applitgada uschia sco quai ch'ins haja empermess en il cumbat da votaziun. Speranza na hajan ins betg prest la medema situaziun sco en ils onns novanta cun l'affera da fischas, di Funicello.

### Controllas impedeschan fufrognim

La populaziun svizra haja chapì ch'ì d'ovria in'otra lescha per il servetsch d'infurmaziun en vista a la smanatscha en l'Euro-pa, di cusseglier naziunal *Werner Salzmann* (pps/BE) sin radio SRF. La lescha saja equilibrada uschia che la Svizra na possa betg daventar in stadi che fufrogna en la vita da ses burgais. I d'ovria plirs stgallims da lubientscha per ina survegliaziun e la lescha prevedia istanzas da controlla. Plinavant haja mintga burgais il dretg da tschentar la dumonda, sch'el vegnia surveglià dal servetsch d'infurmaziun.

Fin uss dastgava il servetsch d'infurmaziun observar persunas be en l'intschess public. Cun la nova lescha dastga el tadlar giu telefonats, installar minispiums en stanzas privatas, infiltrar computers e duvrar instruments da localisaziun.

La lescha pussibilescha al servetsch d'infurmaziun era l'exploraziun da cabel, vul dir dad evaluar datas ord la communi-caziun d'internet. Il servetsch d'infurmaziun pudess uschia prender en il visier persunas che dovràn tscherts plects en emails.